

Agatha i Eisden tras di otro den Panamerikano di dam

COSTA RICA---Despues di un siman di kompetensia, tabata djasabra ultimo ku e kompetensia Panamerikano di dam a finalisá. Ta trata aki di e edishon pa año 2024, ku a tuma lugá na Costa Rica.

Entre e 42 partisipantenan den kategoria maskulino, Kòrsou a konta ku 3 representashon. Ta trata aki di e promé 3 nan ku a tèminá e kampionato lokal di dam. Nos kampion Carlos Lorevil a tèminá e evento, ku 7 punto, na puesto 38. Mientras ku Clifton Agatha i Mijail Eisden a kaba un tras di otro, ámbos ku 8 punto, respectivamente na posishonnan 24 i 25. E gran favorito Allan Igor Moreno Silva di Brazil, a resultá e kampion, terminando e kompetensia ku 15 punto. Ku esaki e ta pone tambe un rèkòrt nobo, logrando su di 5 titulo Panamerikano den e deporte di dam.

Sota formal pa ekipo di Darryl Lachman

OUSTRALIA---E ekipo di Darryl Lachman, a sufri derota aplastante ayera den futbòl na Oustralia.

Esaki den enkuento bálico pa A-League, na momentu ku Melbourne City FC a logra triunfo pa goliada, blankiando e ekipo di Lachman, Perth Glory, ku skor di 8-0. E wega unda ku e defensor, konosí ku nos selekshon nashonal di futbòl, a hunga kompletu den kousa pèrdí, a alkansá sosiegu ku e ganadónan den bentaha di 5-0.



Darryl Lachman.

Siklista Shanayah Howell di 4 na Colombia

COLOMBIA---E konosido siklista Shanayah Howell, kende Deporte Vigilante a bin ta sigui for di chikí, a logra di 4 puesto den kareda final riba e último fecha di siklismo di e kompetensia Latino Americano na Colombia.

Ta trata aki di e subrina di e konosido Sherry Howell, kende tampoko mester di muchu introduksion den deporte i un di e baluartenan riba nos isla. Despues di e kompetensia aki, e siklista Shanayah lo



Siklista Shanayah Howell i su coach, despues di su premiashon.

sigui ku su preparashonnan pa e kampionato mundial di siklismo, na yüni benidero. •

Fundashon Bicentini ku donashon na e trikolornan



Fundashon Bicentini ku algun material deportivo, pa e sekshon hubenil di Jong Holland.



Remko i Farley, huntu ku algun miembro di e sekshon hubenil trikolor.

WILLEMSTAD---Remko Bicentini den representashon di Fundashon Bicentini a hasi donashon na e parti hubenil di e organisashon di futbòl lokal, e trikolornan di Jong Holland.

Esaki unda ku tabata durante di e fin di siman tras

di lomba, ku Remko a hasi e entrega di algun material deportivo na Farley Sillie, den representashon di e organisashon trikolor. E konosido tékniko ta riba nos isla pa algun dia, pa ku otro proyekto huntu ku su yu hòmber, pero ta sigui duna bék na nos komunitat, ku e tin na su kurason. Banda

di su proyekto i e donashon pa e hòben futbolistanan di Jong Holland, e fundashon lo kumpli tambe ku algun opsekol mas próksimamente. Tur esaki despues ku ya ta konosí, kon últimamente tambe nan a hasi diferente donashon, na entre otro skolnan i hòben deportista nan riba nos isla. •

Aruba kampion di weganan Interinsular 2024

WILLEMSTAD---Despues di un tremendo apertura ofisial djabièrnè mainta, unda a sigui ku kompetensianan djabièrnè i djasabra den SDK, tabata djasabra den oranan di anochi, ku a tuma lugá e klousura i premiashon di e edishon di Weganan Interinsular eskolar ku a tuma lugá na Kòrsou.

Un ke otro despues ku alumnunan di skolnan di islanan ABC a kompetí den básquetbòl 3x3, vòlibòl i atle-

tismo. Tur esaki despues ku tambe tabatin edishonnan ku a tuma lugá na Aruba i Boneiru, durante di e año eskolar aki. E anochi di premiashon i klousura a konta entre otro ku animashon di ONE, unda ku tambe tabatin kantantenan di islanan ABC presente. Ta trata aki di entre otro 'Ajatay' (Kòrsou), 'Rocco' (Aruba) i Luis Moka (Boneiru). E anochi festivo riba Brionplein a tuma lugá despues ku miembronan di e diferente delegashonnan a dal un kome den Fòrti.

Kòrsou a gana den básquetbòl ora Marnix Collega a bira kampion. Den vòlibòl Romerschool a logra e titulo máksimo. Mientras ku den e diferente disciplinan di atletismo, tabatin alumnunan di diferente skol, for di diferente islanan ku a destaká i saka kara. Mientras ku e isla ganadó, pa loke ta Weganan Interinsular 2024, a resultá Aruba. Tur esnan ku tabata den premio a risibí un opsekol i rekuerdo bunita, djasabra ultimo riba Brionplein. •



Parti di premiashon djasabra ultimo riba Brionplein.



Miembronan di e delegashon di Aruba.